

**BOSNA I HERCEGOVINA
SUD BOSNE I HERCEGOVINE
SARAJEVO**

X/06/182-174
189.
15-11-2006
M. Malenec 15:17

**Broj: X-K/06/182
Sarajevo, 31.10.2006. godine**

U IME BOSNE I HERCEGOVINE

Sud Bosne i Hercegovine u vijeću sastavljenom od sudija, Nenada Šeleda kao predsjednika vijeća, Salema Miso i Mehmeda Šatora kao članova vijeća, uz sudjelovanje zapisničara Željke Marenić, u krivičnom predmetu protiv optuženog Leonarda Dushi zbog krivičnih djela organizirani kriminal u vezi sa krivičnim djelom krijumčarenje osoba iz člana 250. stav 1. a u vezi sa članom 189. stav 1. Krivičnog zakona Bosne i Hercegovine, krivičnog djela krivotvorenje isprave iz člana 373. stav 2. Krivičnog zakona Federacije BiH i produženog krivičnog djela teška krađa iz člana 287. stav 1. tačka a) u vezi sa članom 55. KZFBiH, te optuženog Eljmija Iseni, zbog krivičnog djela krijumčarenje osoba u pomaganju iz člana 189. stav 1. KZBiH u vezi sa članom 31. KZBiH, povodom optužnice Tužilaštva BiH broj:KT 376/05 od 21.03.2006. godine, nakon održanog glavnog i javnog pretresa, u prisustvu tužioca Tužilaštva BiH Jasmine Gafić, optuženih Leonarda Dushi i Eljmija Iseni, te branilaca optuženih, Muhameda Podruga i Fadila Abaz, advokata iz Sarajeva, donio je i javno objavio dana 31.10.2006. godine

P R E S U D U

OPTUŽENI:

- 1. LEONARD DUSHI**, rođen 27.05.1972. godine u mjestu Shkoder, Republika Albanija, kosistio se falsifikovanom putnom ispravom SRJ na ime Elšani Besim iz Prizrena, po nacionalnosti Albanac, državljanin R Abanije, privremeno nastanjen u Sarajevu u ulici Envera Šehovića broj 36/III, nalazi se u ekstradicionom pritvoru po rješenju Suda BiH EX-51/05 od 27.09.2005 godine.

2. **ELJMI ISENI**, sin Isena i majke Ljutvije rođene Sadiki, rođen 12.11. 1970. godine u Kumanovu, Republika makedonija, po nacionalnosti Albanac, državljanin BiH, po zanimanju vozač, stalno nastanjen u Sarajevu u ulici Rudija Alvađa broj 9- Novi Grad, oženjen, JMBG: 1211970420031

KRIVI SU

Što su:

1. u vremenskom periodu od 19.11.2004. pa do 27.09.2005 godine, nakon što se Dushi Leonard, kao pripadnik zločinačke organizacije, dogovorio sa njemu poznatim licima- saučesnicima, u ilegalnom prebacivanju lica iz Albanije, preko Crne gore, zatim u BiH, te dalje prema Italiji, za koje svrhe je prethodno pribavio krivotvorenu putnu ispravu SRJ broj 002843014, gdje su na originalnom obrascu unešeni podaci na ime Elšani Besim, te njegova fotografija, dana 19.11.2004 godine je došao u Sarajevo, gdje je iznajmio stan u ulici Envera Šehovića broj 36/III, Općina Novo Sarajevo, prijavio se u Odjeljenu za strance MUP-a Kantona Sarajevo na ime Elšani Besim iz Prizrena, a sve u namjeri kako bi stan koristio za vršenje raznih krivičnih djela, a posebno za smještaj krijumčarenih lica iz Albanije, Srbije i Crne Gore, koje je u dogovoru sa njemu poznatim licima prebacivao u Sarajevo, gdje im je davao utočište u navedenom stanu do predaje ovih krijumčarenih lica drugim, njemu poznatim licima za prebacivanje u zemlje Zapadne Evrope, u kojem stanu je čuvao i druge predmete i dokumentaciju koja mu je bila potrebna radi vršenja ovih krivičnih djela i to: lična karta R Italije broj AH5447810 izdata na dan 13.09.2002 godine na ime Dushi Leonard, rođen 27.05.1972 godine u mjestu Shkoder Republika Albanija (fotografija kao na putnoj ispravi na ime Elšani Besim), sanitarna knjižica na ime Dushi Leonard broj 48421 izdata 28.01.2002. godine, u Italiji, potvrda o prijavi boravišta za strance izdata dana 19.11.2004. godine u Odjeljenu za strance MUP-a KS na ime Zeneli Suleta iz Uroševca, putna isprava Republike Albanije broj ZO839768 na ime Rexepi Bujar, rođen 04.08.1981. u mjestu Shkoder, izdata na dan 19.02.2004

godine sa nepoznatom fotografijom, putna isprava Republike Albanije broj 1806780 na ime Qefalia Petrit rođen 15.03.1969 godine u mjestu Goraj, Shkoder, R Albanija, izdata na dan 17.03.2001 godine, sa nepoznatom fotografijom, lična karta SRJ broj KP25581 na ime Avni Krasniqi rođen 22.04.1974 godine u Prištini AP KiM R Srbija sa fotografijom optuženog, te fotokopija putne isprave na ime Elšani Besim, koju je Dushi Leonard predao službenicima II PU Sarajevo, kao i dežurnom tužitelju Ostojić Cvjetku, legitimisajući se tim imenom i prezimenom (putna isprava nalazi se kod optuženog), dana 26.09.2005 godine angažovao Iseni Eljmija kao vozača i pomagača u preuzimanju krijumčarenih lica u BiH, gdje je Iseni na dan 26.09.2005 godine preuzeo dva lica iz Albanije i to Rakaj Alfonsa i Ler Ermala, lica zainteresovana za odlazak u zemlje Zapadne Evrope-Italiju, koja lica su zajedno sa NN licem-organizovanim vodičem, šumskim putevima prešli granicu Albanije u Crnu Goru, a zatim u Crnoj Gori u mjestu Tuzi, nakon što su predata drugom NN licu, organizovanom vozaču, istom platili 800,00 Eura (400 Eura po osobi), kao polovinu novačanog iznosa cijene za ilegalno prevođenje preko međudržavnih graničnih prijelaza, kada su lica u ranim jutarnjim časovima stigla u Sarajevo, gdje ih je prema uputama Dushi Leonarda preuzeo Iseni Eljmi i smjestio u njegov stan u ulici Envera Šehovića broj 36/III, dajući licima upute da ostanu u stanu i nikome ne otvaraju vrata, kako je to naredio Leonard, da bi službenici II Policijske uprave na dan 27.09.2005. godine, po službenom pretresu pomenutog stana, u istom pronašli ova dva lica iz R Albanije pod imenom Rakaj Alfons i Ler Ermal, i nakon što su službenici II PU legitimisali lica koja žele da uđu u gore pomenuti stan, utvrdili da se jedno lice predstavilo kao Elšani Besim i pokazalo takvu ličnu kartu, dok je drugo lice bio Bajrić Almir, rođen 23.06.1985 godine iz Bužima, kojeg je Dushi Leonard najvjerovatnije imao namjeru angažovati za prevođenje ovih albanskih državljana na graničnom prelazu Izačić između BiH i R Hrvatske.

Leonard Dushi sam:

2. u vremenskom periodu od 03.08. do 06.09.2005 godine, u ulici Envera Šehovića broj 36/III Općina Novo Sarajevo, u namjeri pribavljanja protivpravne imovinske koristi, nakon što se lažno predstavio kao Elšani Besim, na koje ime je posjedovao falsifikovanu putnu ispravu, Dushi Leonard još u 2004 godini obećao Šalja Rešatu

iz Makedonije, da će mu na nelegalan način obezbijediti odlazak u Belgiju, te nakon što je Šalja Rešat po dogovoru u avgustu mjesecu došao iz Makedonije u Sarajevo, ovog smjestio u iznajmljeni stan na gore pomenutoj adresi, a zatim mu na ime troškova odlaska u Belgiju u više navrata uzimao novac, pa kada je iznos dosegao 300 Eura, Šalja Rešat je slučaj prijavio MUP-a Kantona Sarajevo- II PU, zbog čega je Kantonalni tužilac dana 07.09.2005 godine otvorio istragu pod brojem KT-3177/05 protiv osumnjičenog Elšani Besima, zbog osnova sumnje na izvršenje krivičnog djela prijevare, na osnovu koje je Kantonalni sud Sarajevo donio rješenje o određivanju pritvora za Elšani Besima (Dushi Leonarda) u trajanju od mjesec dana, da bi tužilac zatim obustavio istragu, te stavio prijedlog za puštanje iz pritvora na dan 15.09.2005 godine, jer je Šalja Rešat iz nepoznatih razloga naprasno promijenio iskaz, navodeći da prevare od strane osumnjičenog Elšani Besima nije bilo, nakon čega je Elšani Besim dana 27.09.2005 godine ponovno uhvaćen i priveden pred sudiju Suda BiH, a po potjernici Interpola iz Rima, Italija, kada je utvrđeno da se u ličnosti Elšani Besima radi o potraživanom Dushi Leonardu, licu koga Interpol Rim potražuje zbog izvršenja, odnosno saučesništva u izvršenju djela teške krađe, ilegalne imigracije, zbog članstva u kriminalnom udruženju te krivotvorenje pasoša i dr.

3. dana 13.08.2005 godine oko 02,30 sati u ulici Envera Šehovića broj 54, Općina Novo Sarajevo, nakon što je podesnim predmetom razbio vakumirano staklo na ulaznim kliznim vratima prostorija „General servisa“ D.O.O. Sarajevo („Gorenje“), ušao u unutrašnjost prostorije, gdje je, podesnim predmetom razbio i stakla na troja vrata izloga, a zatim uzeo i prisvojio : 2 video kamere marke „Sony“, 7 mobilnih telefona marke „Nokia 7260“, „Nokia 6100“, „Nokia 6021“, „Nokia 6820“, „Sony Ericsson K 700I“, „Samsung SGH-E300“ i „Samsung SGH-X640“ te 1 fotoaparata digitalni marke DSC-S60, nakon čega se sa otuđenim predmetim udaljio u nepoznatom pravcu, čime je za sebe pribavio protivpravnu imovinsku korist, te oštetio navedenu firmu za iznos od oko 6.500,00KM.
4. dana 29.08.2005 godine oko 05,25 sati, na istom mjestu i u istoj prodavnici firme „General Servis“ d.o.o. Sarajevo, nakon što je upotrebom podesnog predmeta slomio staklo na ulaznim vratima, a zatim upotrebom fizičke snage odvalio okvir vrata, te po ulasku u unutrašnjost prostora prišao do dvije izložene vitrine, gdje je na

ovima razbio staklo, a zatim sa polica uzeo i prisvojio : 1 auto DVD marke „Sony“ crne boje, 2 fotoaparata marke „Sony“ sive boje od kojih je jedan MP3 i 3 mobilna telefona marke „Nokia“ tip 6020, 6021, i 6100 crne boje, kao i dva diskmena, a zatim se udaljio sa lica mjesta, na koji način je za sebe pribavio protivpravnu imovinsku korist, a navedenoj firmi pričinio štetu u iznosu od oko 4.000,00KM.

Dakle, **Leonard Dushi** pod tačkom 1. i 2. kao pripadnik zločinačke organizacije, iz koristoljublja preko državne granice preveo više lica , koja ne ispunjavaju uslove za zakonit ulazak preko državne granice, pod tačkom 2. preinačene javne isprave upotrijebio kao prave te pod tačkom 3. i 4. obijanjem došao do stvari iz zatvorenog prostora, s ciljem da njihovim prisvajanjem pribavi sebi protivpravnu imovinsku korist, a

Eljmi Iseni pod tačkom 1. pomagao Dushi Leonardu da iz koristoljublja preko državne granice prevede više lica, koja ne ispunjavaju uslove za zakoniti ulazak preko državne granice.

Čime su:

Leonard Dushi, pod tačkom 1. i 2. počinio krivično djelo organizirani kriminal u vezi sa krivičnim djelom krijumčarenje osoba iz člana 250 stav 1. u vezi sa članom 189. stav 1. Krivičnog zakona BiH, pod tačkom 2. krivično djelo krivotvorenje isprave iz člana 373. stav 2. Krivičnog zakona Federacije BiH i pod tačkom 3. i 4. počinio produženo krivično djelo teška krađa iz člana 287. stav 1. tačka a) u vezi sa članom 55. Krivičnog zakona Federacije BiH, a

Eljmi Iseni, pod tačkom 1. počinio krivično djelo krijumčarenje osoba u pomaganju iz člana 189. stav 1. Krivičnog zakona BiH, u vezi sa članom 31. KZBiH.

Pa Sud optuženom Leonardu Dushi, na osnovu navedenih zakonskih propisa

- za krivično djelo organizirani kriminal u vezi sa krivičnim djelom krijumčarenje osoba iz člana 250. stav 1. u vezi sa članom 189. stav 1. Krivičnog zakona BiH, u t v r đ u j e

kaznu zatvora u trajanju od 3 (tri) godine

- za krivično djelo krivotvorenje isprave iz člana 373. stav 2. Krivičnog zakona Federacije BiH, *u t v r đ u j e*

kaznu zatvora u trajanju od 6 (šest) mjeseci

- za produženo krivično djelo teška krađa iz člana 287. stav 1. tačka a) u vezi sa članom 55. Krivičnog zakona Federacije BiH, *u t v r đ u j e*

kaznu zatvora u trajanju od 1 (jedne) godine i 10 (deset) mjeseci

pa Sud optuženog Leonarda Dushi, uz primjenu odredbi člana 53. stav 1. i člana 48. Krivičnog zakona BiH

OSUĐUJE

Na jedinstvenu kaznu zatvora u trajanju od 5 (pet) godina

a optuženom Eljmiju Iseni, na osnovu navedenih zakonskih propisa, uz primjenu člana 58. i člana 59. Krivičnog zakona BiH, Sud i z r i č e

UVJETNU OSUDU

Kojom se utvrđuje kazna zatvora u trajanju od 10 (deset) mjeseci, a koja se neće izvršiti ako optuženi u roku od 2 (dvije) godine od dana pravosnažnosti presude ne počinu novo krivično djelo.

Na osnovu člana 74. stav 1. Krivičnog zakona BiH, od optuženog Leonarda Dushi oduzimaju se predmeti- dokumenti i to: putna isprava SR Jugoslavije, serijski broj 002843014, izdata dana 02.07.2001 godine na ime, Elšani Besim, lična karta SR Jugoslavije, serijskog broja CP00013147, registarskog broja KP 25581, izdata dana 12.09.2001 godine, na ime Avni Krasniqi, putna isprava Republike Albanije broj Z0839768, izdata dana 19.02.2004 godine, na ime Rexhepi Bujar, rođen 04.08.1981 godine u mjestu Shkoder, putna isprava Republike Albanije broj 1806780, izdata

dana 17.03.2001 godine, na ime Qefalia Petrit rođen 15.03.1969 godine u mjestu Goraj, Shkoder, te potvrda o prijavi boravišta za lice Zeneli Suleta, od 19.11.2004 godine i potvrda o prijavi boravišta za lice Besim Elšani, od 19.11.2004 godine.

Na osnovu člana 198. stav 2. Zakona o krivičnom postupku BiH, oštećeni se sa eventualnim imovinsko pravnim zahtjevom za naknadu štete upućuju u parnicu.

Na osnovu člana 188. stav 4. Zakona o krivičnom postupku optuženi Leonard Dushi i Eljmi Iseni se oslobađaju dužnosti plaćanja troškovi krivičnog postupka.

O b r a z l o ž e n j e

Tužilaštvo BiH, optužnicom broj :KT 376/05 od 21.03.2006 godine, optužilo je Leonarda Dushi i Eljmija Iseni, zbog krivičnih djela organizirani kriminal u vezi sa krivičnim djelom krijumčarenje osoba iz člana 250. stav 1. u vezi sa članom 189. stav 1. Krivičnog zakona Bosne i Hercegovine, krivičnog djela krivotvorenje isprave iz člana 373. stav 2. Krivičnog zakona Federacije BiH i produženog krivičnog djela teška krađa iz člana 287. stav 1. tačka a) u vezi sa članom 55. KZFBiH, te krivičnog djela krijumčarenje osoba u pomaganju iz člana 189. stav 1. KZBiH u vezi sa članom 31. KZBiH, temeljeći optužbu na izvedenim dokazima u istrazi i priloženim uz optužbu, koji daju osnov za prijedlog tužilaštva BiH da se optuženi oglase krivim za navedena krivična djela i da se kazne po zakonu.

U toku dokaznog postupka pred sudom su izvedeni dokazi optužbe, i to neposrednim saslušanjem svjedoka Mehmeda Zečića, Zdravka Vinovrški, Semira Letića, Fadila Aliju, Amera Omeragić, Irfana Kaljača i Samira Selimović, te vještaka Muniba Dedović, Ismeta Katana, Esada Bilić i Hazima Šahbaz, a pročitani su iskazi svjedoka Alfonsa Rakaj, sa zapisnika o saslušanju svjedoka, Odjeljenja kriminalističke policije II PU Sarajevo broj 02/3-2-3-/05 od 27.09.2005, iskaz svjedoka Ler Ermala sa zapisnika o saslušanju svjedoka, Odjeljenja kriminalističke policije II PU Sarajevo broj 02/03-2-3-/05 od 27.09.2005 godine, te iskazi svjedoka Rešata Šalja sa zapisnika o saslušanju svjedoka, Odjeljenja kriminalističke policije II PU Sarajevo broj 02/3-2-3-/05 od 07.09.2005 godine i 09.09.2005 godine i

zapisnik o saslušanju svjedoka, Kantonalnog tužilaštva Kantona Sarajevo broj KT-3177/05 od 09.09.2005 godine. Sadržajno su izneseni materijalni dokazi, odnosno izvršen je uvid u: Službeni izvještaj, Odjeljenja kriminalističke policije II Policijske uprave MUP-a KS, od 04.10.2005 godine, Potvrda o privremenom oduzimanju predmeta II PU Novo Sarajevo broj: 02/3-2-3-408/05 od 27.09.2005 godine, Zapisnik o prepoznavanju osoba- predmeta, II PU Novo Sarajevo broj 02/3-2-SL/05 od 27.09.2005 godine, zapisnik o pretresanju stana, drugih prostorija i pokretnih stvari MUP, II PU broj 02/3-2-3-24 od 09.09.2005 godine sa potvrdom o privremenom oduzimanju predmeta broj 02/3-2-3-363/05 od 09.09.2005 godine, fotokopija prve i druge stranice putnih isprava, Republike Albanije na ime Rakaj Alfons i Ler Ermal, zapisnik o saslušanju Elšani Besima, Alias Leonard Dushi, pod brojem Ex-51/05 od 01.02.2006 godine, identifikacione elemente Ministrastva sigurnosti NCB Interpol Sarajevo, za lice Leonard Dushi od 27.09.2005 godine, difuzna potjernica iz Rima od 17.06.2004 godine sa fotografijama potraživanog lica, te otiscima prstiju, zvanična zabilješka Kantonalnog tužilaštva Kantona Sarajevo broj KT-3177/05 od 09.09.2005 godine, službena zabilješka Kantonalnog tužilaštva Kantona Sarajevo broj KT-3177/05 od 23.09.2005 godine, dopis Kantonalnog tužioca broj KT-3318/05 od 28.10.2005 godine, zapisnik o pretresanju stana, drugih prostorija i pokretnih stvari MUP UP II PU Sarajevo broj 02/3-2-3-26/05 od 27.09.2005 godine sa potvrdom o privremenom oduzimanju predmeta, broj 02/3-2-3-409/05 od 27.09.2005 godine i potvrdom o vraćanju privremeno oduzetih predmeta od 03.10.2005 godine, potvrda o vraćanju privremeno oduzetih predmeta broj 02/3-2-408/05 od 29.09.2005 godine, popis ukradene robe od „General Servis“-a, zapisnik o uviđaju MUP KS II PU broj 02/3-2-3-U-427/05, od 13.08.2005 godine, zapisnik o uviđaju, MUP KS II PU broj, 02/3-2-3-U-447/05 od 29.08.2005 godine, fotodokumentacija MUP KS, Odjeljenje krim tehnike broj 2704/05 od 29.08.2005 godine, fotodokumentacija MUP KS, Odjeljenje krim tehnike broj 2551/05 od 13.08.2005 godine i CD sa snimcima kamere za nadzor broj 3 instalirane u prostoriji „General Servis-a“ DOO Sarajevo.

Odbrana je izvela dokaze saslušanjem svjedoka, Irfana Kaljača i Amera Omeragić.

Ocjenom izvedenih dokaza optužbe, te dokaza odbrane, pojedinačno i u međusobnoj povezanosti Sud je donio odluku kao u izreci ove presude iz sljedećih razloga:

Uvjerenje Suda da su optuženi Leonard Dushi i Eljmi Iseni počinili krivična

djela navedena u izreci presude, na način, u mjestu i vremenu, kako je to pobliže navedeno u presudi, proističe iz dokaza optužbe – prije svega iskaza svjedoka, ali i drugih materijalnih dokaza predloženih na glavnom pretresu.

Naime, svjedok Alfons Rakaj, čiji je iskaz, odlukom vijeća, pročitao na glavnom pretresu, je u svom iskazu od 27.09.2005 godine izjavio da poznaje čovjeka po imenu Leonard, a poznat mu je i Leonardov otac po izgledu i zna da je Leonard državljanin Albanije i da živi u Shkodru, ali već nekoliko godina tu ne živi već samo povremeno dolazi u Albaniju kod porodice. Leonarda nije vidio od kada se ovaj oženio ženom koju zna po imenu Neside prije godinu dana, ali je Leonardovu ženu vidio prije 7 do 10 dana i poznato mu je, da je ona u drugom stanju. Njegova familija poznaje Leonarda, kao i porodicu Leonardove žene.

Svojim roditeljima, izrazio je želju, da bi volio otići u Italiju radi zaposlenja, nakon čega su njegovi roditelji kontaktirali sa njemu nepoznatom osobom u vezi njegovog prebacivanja u Italiju, a ta osoba je u mjestu Tuzi, Srbija i Crna Gora i ta osoba je obećala da će ga prebaciti ilegalno u Italiju, kao su mu rekli roditelji. Dana 21.09.2005 godine zajedno sa poznanikom Ler Ermalom, kombijem iz Skadra, krenuo je do u blizinu granice Albanije i Crne Gore. Objasnio je da taj kombi inače na taj način taksira od Skadra do granice i uvijek tako cirkuliše. Pješice su on i Ermal, uz jednog vodiča, šumskim putem, van graničnog prijelaza, ušli u Crnu Goru, gdje ih je čekao golf sive boje. Vodič ih je predao vozaču golfa, a do vozila je došao još jedan čovjek starosti oko 35 godina, koji se predstavio kao čovjek sa kojim je njegova porodica razgovarala. Ne sjeća se kojim se imenom predstavio. Rekao im je da će mijenjati vozila, ali da će stići do Italije. Tom čovjeku su dali po 400,00 EUR-a nakon čega ih je vozač sa vozilom „golf“ doveo do mjesta Tuzi gdje im je rekao da pređu u vozilo „Opel“, malo starije proizvodnje, tamno smeđe boje, na kojem je na krovu stajala taxi oznaka. Taj taksista ih je odveo do Nikšića, gdje ih je smjestio u jedan hotel, i gdje su boravili dva do tri dana. Ništa nisu plaćali, hrana i spavanje je bilo plaćeno. Ništa mu nije rečeno o tome, da li je njegova porodica ugovorila da će nekome dati novac za njegovo ilegalno prebacivanje do Italije.

Nakon toga, po njih je došao jedan stariji čovjek, sasvim drugim vozilom, a sa njim je bio i jedan mlađi momak, i poslije kraće vožnje izašli su iz vozila sa tim momkom i pješice su došli do neke manje šumice. U šumici je bilo parkirano kombi vozilo bez sjedišta i u istom su zatekli još 4 do 5 mladića iz Albanije. Ušli su u vozilo, a taj momak je sjeo za volan i tako su krenuli, da bi nakon vožnje kroz šumu, nakon par sati stali i mladić im je rekao da će spavati pod šatorom. On je zatim, sa kombijem otišao, da bi po njih ujutro

došla druga dva čovjeka, pa su pješice hodali još nekih sat ili dva i misli da su nakon toga ušli u Bosnu. Oko njih je bila samo šuma. Tada je po njih došlo drugo kombi vozilo, bijele boje i neki čovjek ih je vozio oko dva sata, nakon čega se zaustavio pored puta, gdje su čekala druga dva vozila crne boje, misli da su bila bosanska vozila, jer su brzo stigli do Sarajeva. Zaustavili su se na mjestu gdje je vidio jednu buregdžinicu, jedan supermarket i jednu prodavnicu sa voćem i povrćem. Vozači su im rekli da ostanu tu i da čekaju, pa nakon što su čekali oko sat vremena, a niko nije dolazio, sa mobitela je poslao poruku svojim roditeljima kući u Albaniju. Oni su mu dali Leonardov broj, pa je tada sa svog mobitela pozvao Leonarda i istom opisao gdje se nalazi. Leonard mu je rekao da nije u mogućnosti trenutno doći po njih i da će nazvati prijatelja, a ako ih ovaj ne bude mogao naći, Leonard će svom prijatelju ponovo pojasniti gdje se oni nalaze.

Nakon 5 do 10 minuta, došao je jedan čovjek sa crvenim vozilom, misli da se radi o vozilu „Fiat“ i rekao im da je on Leonardov drug, da ga je on poslao po njih, te da će ih on odvesti do stana, gdje će ih smjestiti i da nikome ne otvaraju vrata.

Leonarda nikako nije vidio, jer se nije pojavljivao, a u stanu su ostali dan i noć. Pokazana mu je fotografija jednog lica u prisustvu prevodioca, u II PU i tvrdi da je upravo taj čovjek došao po njih na mjesto gdje su ih prethodno ostavili ljudi koji su ih dovezli. Ostala lica su valjda imala dogovor da dođu do tog mjesta i oni su otišli dok su on i njegov drug čekali odgovor Leonarda, te dolazak ovog čovjeka čiju je fotografiju vidio kod policajaca u prisustvu sudskog prevodioca i inspektorice, odjeljenja za strance MUP-a Kantona Sarajevo. Saopšteno mu je da se radi o licu koje je crvenim vozilom došlo po njih, da se zove Eljmi Iseni iz Kumanova i taj čovjek ih je odvezao do stana.

Roditeljima je rekao da je na sred ulice, u Sarajevu, nakon čega su oni vjerovatno otišli do Leonardove žene, tražili broj i SMS porukom mu isti poslali na mobitel, te je on kontaktirao sa Leonardom.

Iskaz ovog svjedoka, sud je cjenio objektivnim i uvjerljivim, ne nalazeći niti jedan razlog da ne govori istinu, ovaj svjedok jasno opisuje način na koji je organizovano njihovo ilegalno prebacivanje, uz novčanu naknadu iz Albanije do Sarajeva i ulogu koju su u tome imali optuženi Leonard Dushi i Eljmi Iseni, te kako ih je Eljmi Iseni, po nalogu Leonarda Dushi, dovezao do stana u ulici Envera Šehovića, u Sarajevu, gdje ih je privremeno smjestio, do njihove predaje drugim licima, koja su trebala da ih prebace dalje, u zemlje zapadne Evrope.

O ovome je svjedočio i svjedok Ermal Ler, čiji iskaz je takođe pročitao na glavnom pretresu, i koji je izjavio da poznaje lice po nadimku Leo koji je njegov komšija iz mjesta Shkoder, kao i njegovu suprugu po nadimku Ela koja je trenutno u drugom stanju. Isto tako poznaje njegovog oca, koji je profesor engleskog jezika u Shkoderu. Sa Leovom suprugom je zajedno, sa svojim prijateljem Rakaj Alfonsom, kontaktirao prije oko tri mjeseca i ona im je rekla da mogu otići u Sarajevo i javiti se Leu, koji će im pomoći da se zaposle u Sarajevu. Od Leove supruge su dobili njegov broj mobilnog telefona, ali su kasnije, nakon dolaska u Sarajevo i kontakta sa Leom taj papir bacili. Iz Albanije su krenuli u subotu 24.09.2005 godine. Normalno su prešli granicu Albanije i SCG i došli u mjesto Tuzi, gdje su pronašli jednog taksistu, te ga pitali da li ih može odvesti u Sarajevo. Ovaj im je odgovorio da bi pristao, ukoliko bi platili po 800,00 Eura po osobi, na šta su oni pristali. Radilo se o taksi vozilu marke „Opel Kadet“ ili „Vectra“, smeđkaste boje sa registracijom Nikšića, i kada su stigli u Sarajevo tada su taksisti dali po 800,00 Eura. Taksista je u Nikšiću sa vozila skinuo TAXI obilježje i nastavili su vožnju po noći, kao u običnom autu. Jedno vrijeme su išli normalnim putevima, a kasnije ih je taj vozač vozio kroz neke šume i putevima koji mu nisu poznati. Nekoliko sati, ispred vozila u kojem su se nalazili, išlo je jedno drugo vozilo, a iza još jedno vozilo. To je trajalo sve do dolaska u blizinu nekog vojnika, kada su se ta dva vozila izgubila iz vida, a vozač vozila u kojem su se oni nalazili dao je tom vojniku neki papir. Misli da nije bio u pitanju pasoš, njihove pasoše nije niko tražio na uvid. U Sarajevo su došli, misli u ponedjeljak ujutro oko 09,00h. Vozač ih je uvezao u Sarajevo kroz neko selo, vidio je neke kuće kao i natpis Policija, vozač je pored policije malo ubrzao i oni su ušli u grad. Stali su pored nekog motela, novac dali vozaču, nakon čega se on udaljio. Uspjeli su sa nekim čovjekom da se dogovore da im da svoj mobitel kako bi nazvali Lea, pa je on razgovarao sa Leonardom-Leom, putem mobilnog telefona. Objasnio je Leonardu gdje se nalaze i Leo im je rekao da ga sačekaju. Nakon dvadesetak minuta, došao je Leonard sa crvenim vozilom marke „Fiat Punto“, nakon čega ih je odvezao direktno u stan, gdje ih je našla policija. Leonard je sa njima boravio u stanu svega oko 10 minuta, i rekao da će doći i posjećivati ih. Nikuda nisu izlazili iz stana, ali kasno poslijepodne je na vrata lupala policija, a oni nisu smjeli otvoriti vrata. Nisu zvali Leonarda da mu to kažu jer ih je bilo strah. Policija je ponovo dolazila 27.09.2005 godine, kada su jače lupali na vrata, pa su otvorili, jer su se bojali da će policija provaliti u stan, po nalogu suda. Priveli su ih i on je izjavu dao u prisustvu ovalštenog sudskog prevodioca za Albanski jezik. Poznato mu je

da bez vize nije mogao ući u BiH, ali isto tako zna da mora platiti cijenu dolaska u BiH. Od novca je imao samo još 10,00 Eura, nema bilo kakve familije u Sarajevu, pa se mislio baviti bilo kakvim poslom.

Iako se ovaj iskaz donekle razlikuje od iskaza svjedoka Alfonsa Rakaj, iz onoga što je ovaj svjedok rekao, ipak se može steći uvjerenje o organizovanosti njihovog prelaska, uz novčanu naknadu iz Albanije, preko SCG do Bosne i Hercegovine, i o učesću Leonarda Dushija u tom ilegalnom prebacivanju, obzirom da i sam svjedok kaže, da mu je bilo poznato da bez vize nije mogao ući u BiH, ali je isto tako znao da je morao platiti cijenu dolaska u BiH.

Svjedok, Zdravko Vinovrški, je u svom iskazu izjavio da poznaje Eljmi Isenija, jer svjedokova agencija radi knjigovodstvo za firmu Isenija. Sa Isenijem je imao posla isključivo vezano za knjigovodstvo, a ne zna koje auto on vozi, zna da je bilo više auta. Jedne prilike, kada se Iseniju rodilo dijete, zovnuo ga je telefonom, da ga pita gdje da kupi krevetac djetetu. Rekao mu je da je zaboravio mobilni u autu, a da je on u salonu namještaja, pa je zamolio svjedoka da ode do njegovog auta i da mu donese mobitel, jer će ga možda neko zvati. Sjeća se da je to bilo neko crveno auto, neki „Fiat“, ali ne zna da li je bilo vlasništvo Isenija. Došao je do auta, izvadio mobitel, i kada je pošao da zatvori vrata, prišao mu je čovjek u civilu i rekao mu da ne bježi, a taj čovjek mu je pokazao da je službeno lice i upitao ga šta radi kod auta. Tada je odveden u PU Novo Sarajevo i pitali su ga na iste okolnosti koje je sada objasnio. Iseniju se često dešavalo da zaboravlja mobitel u autu. Ni slučajno ne bi otišao do auta, da je znao da je to vezano za neke kriminalne radnje. Uvijek je imao korektan odnos sa Isenijem, tako da je i potpisnik na računu u banci, jer je Iseni imao povjerenje u njega.

Objašnjava dalje, da je ključeve od auta dobio od Isenija, jer je autom naišao do njega, a ne zna odakle ga je Iseni zvao. Rekao mu je da dođe do glavne pošte, robne kuće Šipad i da mu donese telefon. Vozilo je bilo u ulici Envera Šehovića, pored prodavnice „Gorenje“. Svjedok je parkirao vozilo pored tog crvenog auta, kojeg je otključao i uzeo mobitel.

Svjedok, Amer Omeragić je izjavio da se dana 27.09.2005 godine, nalazio u operativnom timu, sa pripadnicima SFOR-a Italija. Trebala se nadzirati kuća gdje je navodno stanovao Dushi. Znalo se da vozi „Fiat Punto“, crvene boje. U jednom trenutku primjetio je lice koje je u blizini parkiralo pomenuto vozilo, izašlo iz njega i uputilo se prema zgradi u kojoj je, vjerovalo se, bio nastanjen Dushi. Kada je legitimisao to lice ustanovljeno je

da se radi o izvjesnom Zdravku, kojeg je, prema njegovim tvrdnjama, poslao Eljmi Iseni po vozilo, da ga preparkira. Nakon toga, je do vozila došlo drugo lice i nakon legitimisanja, ustanovljeno je da se radi o Eljmiju Iseni, kojeg je svjedok prepoznao u sudnici.

Svjedok, Irfan Kaljača je izjavio da je dana 27.09.2005. sa kolegom poslan u ulicu Envera Šehovića, jer je bilo indicija da Dushi koristi „Fiat Punto“, crvene boje i da je navodno ostavljeno na parkingu iza Veterinarskog fakulteta. Pojavio se stariji čovjek i rekao da je dobio ključ od izvjesnog gospodina, da prebaci vozilo. Ne sjeća se imena, ali se sjeća da je bio stariji gospodin i sijed. Pozvali su ga da, da izjavu, da bi nakon pregleda vozila našli mobilni telefon i taj gospodin je kontaktirao nekog drugog gospodina, koji je nakon par trenutaka došao, radilo se o Iseni Eljmiju. Svjedok je objasnio da je vozilo već bilo parkirano kada su on i kolega Omeragić stigli, a poslije sat vremena došao je taj stari gospodin. Lica u uniformama su javila da se lice koje je parkiralo vozilo udaljilo i da oni trebaju da dođu, da motre na vozilo.

Da su Alfons Rakaj i Ermal Ler bili smješteni u stanu koji je iznajmio Leonard Dushi u Sarajevu, u ulici Envera Šehovića broj 36/III, potvrdio je i svjedok inspektor, II PU Sarajevo, Mehmed Zečić, koji je izjavio da su vršili pretres stana po naredbi suda i da su u stanu zatekli dva lica albanske nacionalnosti, sa putnim ispravama na ime Ermal Ler i Alfons Rakaj, koji nisu imali utisnut bilo kakav žig u putne isprave prilikom prelaska granice, a poznato je da albanski državljani moraju imati vizu za ulazak u BiH. Ovaj svjedok je također izjavio da su u stanu pronađeni brojni dokumenti, između ostalog putna isprava R. Albanije, na ime Leonard Dushi sa njegovom slikom, koja je bila zaljepljena ispod ladice jednog stola, kao i lična karta sa fotografijom Leonarda Dushi, ali na ime Avni Krasniqi, što sve potvrđuje i Službeni izvještaj II PU MUP-a KS broj: 02/3-2-3-KU:8972/05 od 04.10.2005 godine. Ovi dokumenti su prema potvrdi o privremenom oduzimanju predmeta od 27.09.2005 godine, privremeno oduzeti i dostavljeni na vještačenje.

Vještačenje je izvršio Ismet Katana, dipl. kriminalista, inspektor MUP-a Sarajevo, Odjeljenje kriminalističke tehnike, kao stručno lice, koji je nakon izvršenog vještačenja dokumenata, našao da je, „SRJ“ lična karta serijskog broja CP 00013147, izdata na ime Avni Krasniqi, dana 12.09.2001 godine, pod rednim brojem KP 25581, autentičnog obrasca, a što potvrđuju zaštitni elementi i to: vodeni znaci u strukturi papira su veoma izraženi,

fluorescencija serijskog broja i zaštitnih merilnih vlakana je veoma dobro izražena, mikrozaštitna štampa je izuzetno urađena. Međutim, pregledom dijela spornog dokumenta, ispod fotografije, pronađeni su tragovi oštećenja strukture dokumenta na dva mjesta, a koji se ne nalaze na poleđini fotografije, a što dokazuje da je prilikom uklanjanja prvopostavljene fotografije izvršeno i uklanjanje dijela obrasca. Pregledom dijela obrasca na kojem se nalaze dijelovi pečata, na spornom dokumentu, pod izvorom forenzičkog svjetla, je utvrđeno postojanje tragova ranije otisnutog pečata, koji je na neutvrđen način uklonjen, te je po postavljanju nove fotografije izvršeno i postavljanje novih otisaka pečata.

Što se tiče putne isprave R. Albanije serijskog broja: Z0838713, izdata 04.02.2004. na ime Leonard Dushi, vještak je utvrdio da je ista autentična, što se dokazuje time što su sve stranice spornog dokumenta zaštićene vodenim znakom, fluorescencija na svakoj stranici spornog dokumenta je veoma izražena uz fluoresciranje merilnih vlakana u dvije boje, zaštitna folija na drugoj strani spornog dokumenta je sa veoma izraženim zaštitama, a način unošenja podataka (teksta i fotografije), je besprijekoran. Imajući u vidu navedeno, vještak je dao svoje stručno mišljenje u kojem je naveo da je lična karta serijskog broja CP00013147, izdata na ime Avni Krasniqi, falsifikovana zamjenom fotografije, dok je putna isprava R. Albanije serijskog broja Z0838713, izdata na ime Leonard Dushi, autentična.

Svjedok, Rešat Šalja je u svom iskazu od 07.09.2005 godine, koji je također pročitan na glavnom pretresu, izjavio da je on državljanin Makedonije, gdje ima stalno prebivalište u selu Lipkovo, općina Kumanovo. Pošto u mjestu rođenja nije mogao da nađe posao, prodao je neku svoju zemlju i mislio je, kao azilant, da oputuje u neku zemlju Zapadne Evrope, tačnije u Belgiju. Dana 03.08.2005 godine došao je u Sarajevo, u stan koji je iznajmio njegov poznanik, u ulici Envera Šehovića broj 36. Poznanik se zove Elšani Besim, on je u Sarajevo došao puno ranije, i na njegov poziv je došao u taj stan. Objašnjava da je u Sarajevu bio i 24.11.2004 godine, gdje je upoznao Besima i tada mu je rekao da želi otići u Belgiju, te mu je Besim obećao da to može uraditi, zbog čega je on i došao u Sarajevo, gdje se privremeno nastanio kod Besima, a ovaj mu je rekao da za prebacivanje iz BiH u Belgiju njemu treba dati 300,00 Eura, a što je on i uradio, dajući mu po manju količinu novca u Eurima, tako da je ta suma dosegla dogovorenih 300,00 Eura. Sve je to trajalo od 03.08.2005. do 06.09.2005 godine, kada je vidio da od dogovorenog posla tj. od njegovog prebacivanja u Belgiju nema ništa,

zbog čega je dana 06.09.2005 godine, došao u PU Novo Sarajevo da podnese prijavu protiv Besima Elšanija, zbog krivičnog djela prevare.

Inače kada je došao u Sarajevo, nije se prijavio u odjeljenje za strance, jer je mislio da će njegov tranzit kroz Sarajevo trajati vrlo kratko, a tako mu je i Besim obećao. Prilikom dogovora sa Besimom, rečeno mu je da bi se ta radnja obavila na crno, ali Besim nije govorio o načinu prebacivanja, niti objašnjavao detalje tog prebacivanja, samo mu je rekao da je njegovo da mu da 300,00 Eura, a ostalo je Besimova briga. Svjedok je na kraju objasnio da je 2001 godine ranjen u ratu u Makedoniji, te je mislio kao azilant da se na crno prebaci u Belgiju, gdje bi lako došao do papira, na osnovu podataka da je iz zemlje u kojoj je bio rat i da je ranjen, zbog čega je i došao u Sarajevo, gdje se našao sa Besimom, a u cilju daljih dogovaranja oko njegovog prebacivanja na crno u Belgiju.

Ovaj iskaz svjedoka sud je cijenio kao objektivan, određen i ubjedljiv, i kao takav potvrđuje da se Leonard Dushi u dužem vremenskom periodu, zajedno sa drugim licima, iz koristoljublja, preko državne granice prevodio lica koja nisu ispunjavala uslove za zakonit ulazak preko državne granice.

O činjenici da je Rešat Šalja, pomemutog datuma podnio krivičnu prijavu protiv Elšani Besima, svjedočio je i svjedok Samir Selimović, koji je kao ovlašteno službeno lice II PU Sarajevo, sačinio zapisnik o prijemu usmene prijave dana 07.09.2005 godine, kada je Rešat Šalja podnio prijavu protiv Elšani Besima, zbog krivičnog djela prevare. Svjedok je pojasnio da je tada bio dežurni i došlo je jedno lice, kojem se ne sjeća imena i prijavilo je drugo lice, koje je nad njim izvršilo prevaru, rekao je da ga je to drugo lice dovelo u BiH i da ga je trebalo dalje prebaciti u Belgiju za 300,00Eura. Misli da je spomenuo da je to lice Elšani Besim.

Istina je, da je svjedok Rešat Šalja naknadno, tačnije 09.09.2005 promijenio svoj iskaz, pa je pred Kantonalnim tužiocem, izjavio da je negdje prije 6 mjeseci bio u Sarajevu, kada je upoznao Elšani Besima, koji mu je tada dao svoj broj mobitela. Objasnio je da je bolestan čovjek, jer je ranjen u noge i da stalno pije tablete za smirenje. Početkom avgusta se javio Besimu i pitao ga može li doći u Sarajevo, da bude kod njega, pa je došao je u Sarajevo, bez ikakve namjere da negdje ide. Kod Besima je spavao, a kasnije je imao namjeru da ide u Zagreb kod prijatelja. Kada je došao u Sarajevo, imao je 1.200,00 Eura i Besimu je dao nešto novca za hranu, ali je u kockarnici izgubio novac, i to prve prilike 150,00 Eura, a onda je dao Besimu 150,00 Eura, da igra za njega, pa su i to izgubili. Poslije je išao svaki dan u

kockarnicu da pokuša izvaditi taj novac, ali je sve izgubio, pa je prodao i sat i mobitel. Poslije toga bio je van sebe, nije znao šta da radi, te je zato otišao u policiju i prijavio Besim. U policiji jeste rekao da se dogovorio sa Besimom, da ga prebaci u Belgiju, za 300,00 Eura, ali to nije istina. Sa Besimom nije imao nikakav dogovor da ga prebacuje negdje u inostranstvo. Besim je bio dobar prema njemu i on je besplatno stanovao kod njega.

Iako se ovaj iskaz svjedoka u bitnom razlikuje od prethodno datog iskaza, ovaj sud, tako izmjenjenom iskazu nije mogao pokloniti vjeru, obzirom da svjedok za tu izmjenu nije naveo razloge koji bi za sud bili ubjedljivi, pa je sud cijenio da je do ove izmjene u iskazu došlo samo iz razloga da bi se Leonard Dushi oslobodio odgovornosti.

Svjedok Rešat Šalja je dao još jednu izjavu dana 09.09.2005 godine u Ojelijanju kriminalističke policije II PU Sarajevo, gdje je izjavio da je u periodu od oko mjesec i pol dana nastanjen u ulici Envera Šehovića broj 36/III, u stanu vlasništvo Zahide Imširović iz Tuzle. Sjeća se da je dana 03.08.2005 godine, kada je došao iz Makedonije u Sarajevo, stupio u kontakt, putem telefona, sa licem koje se njemu predstavilo kao Elšani Besim iz Prizrena, a koji ga je uveo u stan koji je on iznajmio ranije u ulici Envera Šehovića broj 36. Imao je namjeru da ide u Zagreb, te je čekao neki povoljan momenat da nabavi vizu. Iz ranijeg perioda poznaje Elšani Besima, kada je dolazio u Sarajevo u mjesecu novembru 2004 godine. Prilikom dolaska službenika policije u stan, u ulici Envera Šehovića broj 36, izvršen je pretres stana i tom prilikom pronađene su razne putne isprave, među kojima se nalazila i italijanska lična karta na ime Elšani Besim, ali svjedok tvrdi da sa tim nema ništa, niti je znao da uopšte postoje takvi dokumenti.

O izvršenom pretresu i pronađenim dokumentima, svjedočio je i svjedok Mehmed Zečić, koji je izjavio da je u obavljanju svojih redovnih poslova došao do podataka da se lice koje koristi putnu ispravu SCG, na ime Elšani Besim ustvari ne zove tako, već Leonard. U tim prvobitnim saznanjima nije došao do podataka o prezimenu, već samo o imenu i nadimku. Imao je direktno saznanje da je optuženi upleten u proizvodnju i stavljanje u promet droga, organizovanje teških krađa i ilegalno prebacivanje lica preko granice BiH, pretežno Albanaca. Misli, da je to bilo u 8. mjesecu 2005 godine, kada je u PU došao Rešat Šalja, koji je podnio prijavu protiv Elšani Besima i u kojoj je naveo da je došao iz Makedonije sa ciljem da Elšani Besim organizuje njegovo prebacivanje za Belgiju. Policajci su nakon zaprimljene prijave pronašli Besima, lišen je slobode i određen mu je

pritvor. Međutim, odmah sutradan, Rešat je povukao prijavu. Nije mu poznato zašto je to učinjeno, ali misli da je bilo pritisaka od raznih kriminogenih grupa, pa je zbog toga prijava povučena. Već tada je svjedok dobio naredbu za pretresanje stana u ulici Envera Šehovića broj 36, pa kako je Rešat Šalja imao ključ od stana, oni su ga pronašli i u njegovom prisustvu izvršili pretres. U stanu su pronašli, italijansku ličnu kartu sa fotografijom Dushi Leonarda, dvije albanske putne isprave sa fotografijama nekih drugih lica, kao i odreske i stotine drugih dokumenata. O svemu tome sačinjen je zapisnik i predmeti su privremeno oduzeti.

Prema potvrdi o privremenom oduzimanju predmeta, broj 02/3-2-3-363/05 od 09.09.2005 godine, od Šalja Rešata privremeno su oduzeti Carta d Identita (lična karta) R Italije broj AH 544781, na ime Leonard Dushi iz Albanije sa fotografijom Elšani Besima, putna isprava R. Albanije broj 1806780, na ime Quefalija Petrit, izdata 17.03.2001 godine u mjestu Shkoder, putna isprava R Albanije na ime Rexepi Bujar, izdata dana 19.02.2004 godine, potvrda o prijavi boravišta u odjeljenju za strance MUP-a KS, na ime Besim Elšani od 18.11.2004 godine, potvrda o prijavi boravka u Odjeljenju za strance MUP-a KS, na ime Zeneli Suleta od 19.11.2004 godine, fotokopija prve i druge stranice putne isprave izdate u Prištini, na ime Besim Elšani, te zdravstvena knjižica, na ime Leonard Dushi izdata u Italiji 28.01.2002 godine.

Na osnovu prijave Šalja Rešata, Kantonalno tužilaštvo Kantona Sarajevo je pod brojem KT 3177/05, naredbom o sprovođenju istrage od 07.09.2005 godine, pokrenulo istragu protiv Elšani Besima, zbog krivičnog djela prevare iz člana 294. stav 1. KZFBiH, a pošto se radi o stranom državljaninu bio je određen pritvor u smislu člana 146. stav 1. tačka a) ZKP FBiH, kako to proizilazi iz dopisa Kantonalnog tužioca, broj KT 3318/05 od 28.10.2005 godine, upućenog MUP-u Kantona Sarajevo. U dopisu je dalje navedeno da je istraga obustavljena naredbom od 15.09.2005 godine, jer nije bilo osnovane sumnje, da je Besim Elšani počinio navedeno krivično djelo. U toku vođenja postupka sud je imao na raspolaganju pasoš na ime Besim Elšani i to SRJ broj: 002843014. Zbog indicija da je sporan identitet Elšani Besima, dana 08.09.2005 godine, MUP KS, sektor Krim policije, Odjeljenje kriminalističke tehnike, je po naredbi tužioca izvršilo vještačenje navedenog pasoša i utvrdilo da je putna isprava SRJ pod navedenim brojem bez tragova koji bi ukazivali na falsifikovanje, kako ispisanog sadržaja tako i zamjene fotografija. Nakon okončanja istrage, a na zahtjev branioca osumnjičenog, advokata Muhameda Podruga, pasoš je 23.09.2005 godine

vraćen advokatu. U dopisu se dalje navodi da je u međuvremenu stigla krivična prijava MUP-a Kantona na ime Leonarda Dushi iz R Albanije, sa napomenom da se radi o istom licu sa generalijama na ime Besima Elšani i dostavljena je karta identiteta, R Italije pod brojem AH 5447810, izdata 13.09.2001 godine, na ime Leonard Dushi, rođen 27.05.1972 godine, u mjestu Shkoder, R Albanija, a sa fotografijom kao na pasošu SRJ broj 002843014.

Da je putna isprava- pasoš na ime Besima Elšani vraćena advokatu Muhamedu Podrugu proizilazi iz službene zabilješke Kantonalnog tužioca broj KT 3177/05 od 23.09.2005 godine, u kojoj je navedeno da je dana 23.09.2005 godine, pristupio branilac osumnjičenog Elšani Besima, protiv koga je obustavljena istraga zbog krivičnog djela iz člana 294. stav 1. KZ FBiH i tražio da mu se vrati pasoš osumnjičenog, a što je, s obzirom da je istraga obustavljena, učinjeno i tužilac je advokatu uručio pasoš Elšani Besima, SRJ Jugoslavije broj 002843014, koji je izdat 02.07.2001 godine.

Navedeni pasoš bio je predmet vještačenja u Odjeljenju kriminalističke tehnike Sektora kriminalističke policije, a vještačenje je izvršio inspektor Ismet Katana dipl. kriminalist, kao stručno lice, koji je nakon obavljenog vještačenja dao svoje stručno mišljenje u kojem je naveo da je putna isprava SRJ serijskog broja 002843014 autentičnog obrasca, bez tragova koji bi ukazivali na falsifikovanje, kako ispisanog sadržaja, tako i zamjene fotografije. Vjerodostojnost upisanih podataka u dokumentu ne može se potvrditi zbog razlike u mjestu prebivališta i mjestu izdavanja.

Predmet vještačenja bili su i lična karta R Italije na ime Leonarda Dushi, kao i sanitarna knjižica također na ime Leonard Dushi. Ovo vještačenje izvršio je stalni sudski vještak grafolog, prof. Esad Bilić koji je na osnovu izvršene ekspertize dao svoje mišljenje da obrazac Carta d'Identiteta- lična karta serijskih slova i brojeva obrasca AH 5447810, predstavlja originalan obrazac lične karte R Italije na kojem nije utvrđeno prisustvo fizikohemijskih tragova koji ukazuju na izmjenu prvobitno unesenih sadržaja, dok za inkriminirani dokument obrazac „Tessera sanitaria“ – sanitarna knjižica Regiona Friuli-Venezia Giulia R Italija, koja glasi na ime Leonard Dushi, nije se moguće izjasniti u relaciji autentičnosti.

Zbog sumnje da se u ličnosti Besima Elšani i Leonarda Dushi ustvari radi o jednoj te istoj osobi, zatraženo je da se izvrši utvrđivanje identiteta za lice koje se predstavlja kao Besim Elšani. Vještačenje je izvršio Munib Dedović, kao stručno lice MUP-a Kantona Sarajevo, Sektor kriminalističke policije,

Odjeljenje kriminalističke tehnike, koji je u svom nalazu naveo da su na daktiloskopsko vještačenje dostavljeni otisci prstiju i dlanova lica na ime Besim Elšani, sin Faika, rođen 14.03.1972 godine u Prizrenu, koje je sinjaletički obrađeno u prostorijama MUP-a, Kantona Sarajevo, dana 27.09.2005 godine, te sinjaletečki materijal za lice Leonard Dushi, rođen 27.05.1972 godine u Shkoder, obrađen 31.10.2003 godine, dostavljen od strane pripadnika Italijanskog bataljona EUFOR-a.

Upoređivanjem otisaka prstiju sa sinjaletičkog materijala lica Besim Elšani sa dostavljenim sinjaletičkim materijalom na ime Leonard Dushi, utvrđeno je da su identični te da se potvrđuje identitet lica sa pravnim podacima Leonard Dushi, rođen 27.05.1972 godine u Shkoder.

Svjedok, Mehmed Zečić je u svom iskazu izjavio da je u toku 8 mjeseca prijavljena teška krađa u prostorijama „General servisa“, u Sarajevu, u ulici Envera Šehovića. Za tri minute po alarmu patrole su došle na lice mjesta, ali nisu nikoga zatekli. Nakon 16-17 dana, ponavlja se teška krađa na identičan način i tada su patrole bile u blizini, došli su na lice mjesta, ali nisu nikoga zatekli. Kada je svjedok otišao na lice mjesta vidio je da je prodavnica smještena preko puta stana Leonarda Dushi. Daljim radnjama došao je do podatka da je Dushi uzimao određene sume novca u buregdžinici“ Forini“ i da je ostavio u zalog tri mobitela. Nakon toga, poslao je dvojicu policajaca da kažu vlasniku buregdžinice da imaju saznanja da su mobiteli kod njega. Taj čovjek je došao u policijsku upravu i donio mobitele sa sobom. Upoređujući serijske brojeve na mobitelima i serijske brojeve na servisnim listovima, utvrdili su da su brojevi potpuno identični. Pošto je vlasnik prenoćio u PU, organizovano je prepoznavanje da se vidi da li taj Aliju zna ko je lice koje mu je ostavilo te mobitele i on ga je prepoznao.

Krađe su izvršene na način što su staklena vrata pomaknuta i misli da je krađa trajala sve skupa oko minut-dva. Vidio je snimak krađe, ali nije sa sigurnošću mogao prepoznati da se radi o Dushiju. Figurom odgovara, ali je na glavi imao kačket, pa ne može biti siguran da je to isto lice.

Svjedok, Fadil Aliju koji je neposredno saslušan na glavnom pretresu, u svom iskazu je naveo da je prvooptuženog Leonarda Dushija viđao 3-4 puta do sada, jer je ovaj dolazio kao gost, ali tada nije znao kako se zove. Ovaj je od njega posudio, prvo 70,00 KM, pa onda 230,00 KM i kako nije imao da mu vrati novac, dao mu je tri telefona koje je vratio policiji i tom prilikom je potpisao potvrdu. U policijskoj stanici je prepoznao lice Leonarda Dushi

kao osobu koja mu je dala telefone, prepoznavanja se sjeća i tada je sa 100 % sigurnosti pokazao na Dushija.

Izjavu je davao kod Azema Mahmutovića, kojeg ranije nije poznao, ali se datuma ne sjeća. Nikada nije kupio telefone, nego mu je to predato u zalog i pošto pare nije vratio onda je to isto kao da je kupio telefone od njega, za iznos koji mu je ostao dužan. Rekao je da mu je telefone predalo nepoznato lice, ali bilo je prepoznavanje, ne zna ko je vodio postupak, valjda Azem Mahmutović, ostalu dvojicu policajaca nije poznao, kada je Dushija poznao po faci. Policajac mu nije rukom pokazao na Dushija, a prvo je davao izjavu pa je onda išao na prepoznavanje i pošto nije znao kako se to lice zove, prepoznao ga je po liku. Dok nije vidio lice nije mogao reći da je to taj čovjek, ali kada su mu pokazali to lice onda ga je prepoznao i potvrđuje da je osoba koja sjedi u sudnici, zaista osoba koja mu je predala telefone. Niko mu drugi nije dao telefone nego Dushi, rekao je da su telefoni njegovi. Dushi je u radnju svaki put dolazio sa kačketom, a u policijskoj upravi je bio bez kačketa. Prvi put je došao u radnju sam, a drugi put sa nekim licem koje mu nije poznato.

Sud nije imao niti jedan razlog da ne povjeruje u istinitost iskaza ovog svjedoka u pogledu prepoznavanja osobe koja mu je u zalog predala tri mobilna telefona jer, ne samo da je na tu osobu pokazao prilikom prepoznavanja u policijskoj upravi, o čemu je sačinjen zapisni o prepoznavanju osoba pod brojem 02/3-2-SI/05 od 27.09.2005 godine, nego je optuženog Leonarda Dushija sa sigurnošću prepoznao i u sudnici, prilikom svog svjedočenja, kao osobu koja mu je dala te telefone.

Prema potvrdi o privremenom oduzimanju predmeta, PU Novo Sarajevo broj 02/3-2-3-408/05 od 27.09.2005 godine, ovlaštena službena osoba izvršila je privremeno oduzimanje predmeta od Fadila Aliu i to mobilni telefon marke „Nokia“ 6820, serijskog broja 352505008184527, mobilni telefon marke „Nokia“ 6100, serijskog broja 356639002227176, te mobilni telefon marke „Nokia“ 6021, serijskog broja 355687000443577, a navedeni mobilni telefoni vraćeni su Samiru Letiću, radniku „General servisa“, kako je to konstatovano u potvrdi o vraćanju privremeno oduzetih predmeta broj 02/3-2-408/05 od 29.09.2005 godine.

Semir Letić je saslušan u svojstvu svjedoka na glavnom pretresu, kada je izjavio da je zaposlen u „General servisu“, u prodavnici, kao trgovac. Dana 13.08.2005 godine, pozvali su ga ljudi iz obezbjeđenja, oko 3 ili 4 sata ujutro i kada je došao do radnje vidio je da su bila razvaljena klizna,

staklena vrata i da je obijena staklena vitrina sa tehničkom opremom, mobitelima, DVD-ovima, itd. Staklo je bilo razbijeno, a metalni okvir razvaljen. Otuđeno je 7 mobitela, 2 video kamere marke „Sony“, dva aparata za slikanje „Sony“, te je oštećen jedan aparat za slikanje i kućno kino „Sony“. Na otpremnici je popisano sve što je odneseno, sa maloprodajnom cijenom, u iznosu od 6.987,00 KM, bez štete koja je pričinjena na objektu.

Druga krađa izvršena je dana 29.08.2005 godine, takođe u noćnim satima i izvršena je na identičan način kao i prva. Otuđeni su, DVD, 2 fotoaparata, 3 mobilna telefona, 2 diskmena, tako da šteta iznosi 3.709,00 KM.

Svjedok nikada nije čuo za Leonarda Dushi, niti mu je o njemu išta poznato. Postoji video nadzor u prodavnici i alarm. Dvije minute nakon što se upalio alarm došli su ljudi iz obezbjeđenja i oni su predali snimak policiji, tako da on snimak nije gledao.

Oba puta je izvršen uviđaj od strane policije, na licu mjesta, poznato mu je da nisu nađeni otisci prstiju, ali zna da su našli predmet, polugu pomoću koje je izvršena provala.

Prema zapisniku o uviđaju, sačinjenom od strane uviđajne ekipe II Policijske uprave Sarajevo pod brojem 02/3-2-3-U-427/05, dana 13.08.2005 godine, uviđaj je obavljen tog dana, u prostorijama „General servisa“, povodom teške krađe i uviđajna ekipa je ustanovila da je teška krađa izvršena od strane NN lica, tako što je podesnim sredstvom, razbio vakumirano staklo na ulaznim vratima, te iz ležišta izbio jedno krilo vrata i tako ušao u unutrašnjost prostorije . Ulaskom u prostoriju prodajnog salona, NN lice je takođe, podesnim predmetom razbilo staklo na troja vrata na izlogu na kome se nalazila tehnička roba i tom prilikom otuđio dvije video kamere, marke „Sony“, sedam mobilnih telefona, Nokia 7260, Nokia 6100, Nokia 6021, Nokia 6820, sony ericsson K7001, samsung SGH300 i samsung SGHX640, nakon čega se sa otuđenim predmetima udaljio. Na podu, ispred navedenog izloga, pronađen je jedan mobilni telefon i jedan fotoaparat. Navedene prostorije su osigurane video nadzorom. Lice mjesta je fotografisano i fotodokumentacija se nalazi u spisu.

Uviđaj je obavljen od strane ovlaštenih službenih lica II PU Sarajevo i dana 29.08.2005 godine, povodom teške krađe u prostorijama iste firme, o čemu je sačinjen zapisnik pod brojem 02/3-2-3-U-447/05.

Izvršenim uviđajem na licu mjesta, konstatovano je da je teška krađa, provaljivanjem u prostorije „General servisa“ izvršena od strane NN lica, dana 29.08.2005 godine, oko 05,24 sati, kada je registrovano uključenje

alarma, a krivično djelo je izvršeno na taj način što je NN izvršilac, uz pomoć podesnog čvrstog sredstva, razbio staklo dimenzija 43 X 189 cm na ulaznim kliznim vratima firme, zatim fizičkom snagom odvalio okvir istih, ušao u unutrašnjost, gdje je uz pomoć čvrstog predmeta razbio staklo na dvije izložbene vitrine, čija su stakla dimenzija 42x200 cm, iz kojih je otuđen auto DVD, marke Sony, crne boje, dva fotoaparata marke Sony, sive boje od kojih je jedan tip S40, dva diskmena marke Sony, sive boje, od kojih je jedan MP3, tri mobilna telefona marke Nokia, tip 60.20, 60-21 i 6100, crne boje, od kojih jedan ima tipke sive boje, nakon čega je napustio objekat i udaljio se u nepoznatom pravcu.

Izvršenim krim tehničkim pregledom lica mjesta sa unutrašnje strane objekta, pored vrata pronađena jedna veća metalna šipka tzv. „susak“. Lice mjesta je fotografisano i fotodokumentacija je uložena u spis.

Na glavnom pretresu, putem tehničkih uređaja Sud je pregledao CD sa snimcima kamere broj 3, u prostorijama „General servisa“ od 13.08.2005 godine i 29.08.2005 godine.

Navedeni CD snimak kamere broj 3 bio je predmet vještačenja od strane vještaka Hazima Šahbaza, dil. ing. el., koji je u svom nalazu i mišljenju, na osnovu pregleda snimljenog video materijala na CD-u, u zaključku konstatovao da, obzirom da je prilikom usporedbe sa originalnim file-ovima, utvrđeno da su identični datumi i veličine, te da nisu detektovane naknadne promjene ili brisanja, mišljenja je da se radi o vjerodostojnim snimcima.

Ocjenom iskaza svjedoka Mehmeda Zečića, Alfonsa Rakaj, Ermala Ler te Rešata Šalja, činjenice i okolnosti o kojima su svjedočili i to na koji način su došli u kontakt sa optuženim Leonardom Dushi (Besim Elšani), način na koji su došli u Sarajevo i koliko je osoba sudjelovalo u njihovom prebacivanju (o ovome je naročito iscrpno i određeno svjedočio Alfons Rakaj), da niti jednu državnu granicu nisu prešli preko službenih prelaza i da u pasošu nemaju žig ni jednog graničnog prelaza (o čemu je svjedočio svjedok Mehmed Zečić), da nisu imali vize za ulazak u državu, te da su za svoj prelazak morali platiti, koga su pozvali kada su došli u Sarajevo, gdje su smješteni i ko ih je smjestio, te na kraju, kakva im je namjera bila u svemu tome, Sud upravo nalazi utvrđenim da je optuženi Leonard Dushi, kao pripadnik zločinačke organizacije, učinio krivično djelo krijumčarenje osoba albanske nacionalnosti iz Albanije, preko teritorije SCG i Bosne i Hercegovine, s namjerom daljeg prebacivanja u zemlje zapadne Evrope, a sve s nesumnjivom namjerom da na taj način stekne imovinsku korist.

Kada se imaju u vidu utvrđene činjenice realan je zaključak suda da je optuženi pripadnik zločinačke organizacije koja čini krivična djela, u konkretnom slučaju krijumčarenje osoba, nedozvoljeno prebacivanje stranih državljana preko državne granice, sve radi sticanja finansijske koristi, koji preduzima i konkretne radnje u izvršenju krivičnog djela, kao pripadnik zločinačke organizacije, jer upravo on prihvata osobe na području Bosne i Hercegovine, te dalje organizuje njihovo ilegalno prebacivanje preko teritorije Bosne i Hercegovine, do zemalja zapadne Evrope.

Sem toga, u stanu koji je iznajmio optuženi Dushi pronađene su putne isprave Republike Albanije sa fotografijama nepoznatih osoba, lična karta na ime Avni Krasniqi, ali sa fotografijom Leonarda Dushi, koja je prema nalazu vještaka falsifikovana zamjenom fotografije, lična kartu Republike Italije na ime Leonard Dushi, potvrde o prijavi boravišta u odjeljenju za strance MUP-a KS na ime Besim Elšani i Zeneli Suleta, kao i fotokopija prve i druge strane putne isprave izdate u Prištini na ime Besim Elšani, sanitarna knjižica na ime Leonard Dushi izdata u Italiji, kao i putna isprava R.Albanije izdata na ime Leonard Dushi.

Ovoliki broj dokumenata pronađenih u iznajmljenom stanu znači da su ovi dokumenti samo mogli služiti za vršenje krivičnih djela, a da je stan služio za prihvatanje lica koja su ilegalno dolazila u Bosnu i Hercegovinu i odakle se organizovalo njihovo dalje prebacivanje u zemlje odredišta.

Cijeneći sve navedeno, Sud nalazi nesumnjivo utvrđenim da je optuženi Leonard Dushi počinio krivično djelo organizovani kriminal u vezi sa krivičnim djelom krijumčarenje osoba iz člana 250. stav 1. u vezi sa članom 189. stav 1. KZ BiH.

Uvjerenje Suda, da je optuženi Eljmi Iseni počinio krivično djelo krijumčarenje osoba u pomaganju iz člana 189. stav 1. KZ BiH u vezi sa članom 31. KZ BiH, na način kako je to poblizje navedeno u izreci ove presude, proističe iz provedenih dokaza, iskaza svjedoka Amera Omeragića i Irfana Kaljače, kao i svjedoka Alfonsa Rakaj, čiji je iskaz pročitao na glavnom pretresu, te svjedoka Zdravka Vinovrški, koji u svojoj povezanosti daju jasnu sliku o tome kakvu je ulogu u svemu imao Eljmi Iseni.

Naime, svjedok Alfons Rakaj je izjavio da je po njih došao jedan čovjek sa crvenim vozilom, misli da se radi o vozilu „Fiat“, koji im je rekao da je Leonardov drug i da ga je on poslao po njih. Fotografiju tog čovjeka je

vidio kod policajaca i saopšteno mu je da se to lice zove Eljmi Iseni i taj čovjek ih je dovezao do stana.

Svjedok Elmar Ler je izjavio da je po njih vozilom došao Leonard, ali i ovaj svjedok navodi da je u pitanju vozilo marke „Fiat Punto“ crvene boje.

Svjedoci, Irfan Kaljača i Amer Omeragić, koji su nadzirali kuću u kojoj je stanovao Leonard Dushi, izjavili su da se znalo da Leonard Dushi koristi vozilo „Fiat Punto“ crvene boje. Svjedok Kaljača je izjavio da je to vozilo bilo već parkirano kada su oni došli, a da su lica u uniformama javila da se lice koje je parkiralo vozilo udaljilo, te da oni treba da dođu da motre na vozilo.

Po izjavama oba ova svjedoka, nakon izvjesnog vremena se pojavio Zdravko Vinovrški, koji im je rekao da ga je poslao Eljmi Iseni po vozilo, da ga preparkira. Zdravko je kontaktirao Isenija i ovaj je ubrzo došao. Nakon pregleda vozila našli su mobilni telefon.

Izjašnjavajući se o istom pitanju, svjedok Vinovrški je izjavio da ga je nazvao Eljmi Iseni i rekao mu da je zaboravio mobilni u autu i zamolio je svjedoka da ode po telefon. Svjedok se sjeća da je bilo neko crveno auto, neki „Fiat“, bilo je parkirano u ulici Envera Šehovića, pored prodavnice „Gorenja“, a ključeve od auta je dobio od Isenija, jer je autom naišao do njega.

Kada se svi ovi iskazi dovedu u vezu onda je nesumnjivo da je upravo optuženi Eljmi Iseni preuzeo Alfonsa Rakaj i Ermala Ler i smjestio ih u stan Leonarda Dushija, po Dushijevim uputama, te im rekao da nigdje ne izlaze i nikome ne otvaraju vrata, a u ovim radnjama, Sud nalazi da je optuženi Eljmi Iseni počinio krivično djelo krijumčarenje osoba u pomaganju iz člana 189. stav 1. u vezi sa članom 31. KZ BiH.

Nadalje, nesumnjivo je utvrđeno da je optuženi Leonard Dushi posjedovao dvije putne isprave i to jednu Republike Albanije na ime Leonard Dushi, ali i putnu ispravu SRJ na ime Besim Elšani, a obe su bile sa fotografijom Leonarda Dushi.

Prema nalazu vještaka i jedna i druga putna isprava su autentične, odnosno na originalnom obrascu.

Upoređujući otiske prstiju i dlanova lica Besim Elšani, te sinjaletički materijal za lice Leonard Dushi, koji je dostavljen od strane pripadnika

Italijanskog bataljona EUFOR-a, vještak je utvrdio da su otisci istovjetni, te da se potvrđuje identitet lica sa pravnim podacima Leonard Dushi, rođen 27.05.1972 godine.

Kada se ovo ima u vidu, onda je nesporno da je putna isparava SRJ na ime Besim Elšani(koja je vraćena optuženom nakon što je protiv njega obustavljena istraga pred Kantonalnim tužilaštvom Kantona Sarajevo), izdata 02.07.2001 godine, krivotvorena po svom sadržaju, jer podaci koji su navedeni u ovoj putnoj ispravi, u pogledu identiteta osobe koja se služi tom putnom ispravom, ne odgovaraju stvarnim ličnim podacima te osobe, odnosno ličnim podacima Leonarda Dushi.

Utvrđeno je, da je Leonard Dushi, putnu ispravu na ime Besim Elšani predočio službenicima II Policijske uprave, kao i Kantonalnom tužiocu Kantona Sarajevo, te da je pod tim imenom protiv njega i pokrenuta istraga zbog krivičnog djela prevare i određen pritvor, a Kantonalni tužilac to i potvrđuje u svom dopisu upućenom MUP-u Kantona Sarajevo, a sem toga navodi i da je u toku vođenja postupka Sud imao na raspolaganju pasoš na ime Besim Elšani i to SRJ broj 002843014, što znači da je identitet optuženog utvrđen na osnovu pasoša koji je predočio, a na ime Besim Elšani.

U ovim radnjama optuženog Leonarda Dushi, Sud nalazi, da je isti počinio krivično djelo krivotvorenje isprave iz člana 373. stav 2. KZ FBiH, obzirom da putna isprava ima svojstvo javne isprave jer je izdata od strane državnog organa, a podobna je da u javnom saobraćaju može poslužiti kao dokaz neke pravno relevantne činjenice, u konkretnom slučaju kao dokaz identiteta neke osobe.

Sud je, takođe našao utvrđenim, da je optuženi Leonard Dushi počinio i produženo krivično djelo teška krađa iz člana 287. stav 1. tačka a) u vezi sa članom 55. KZ FBiH, na način, u mjestu i u vrijeme kako je to navedeno u izreci presude.

Naime, prema izjavi svjedoka Mehmeda Zečića, isti je došao do saznanja da je Leonard Dushi uzimao određene sume novca u buregdžinici Forini i ostavio u zalog tri mobitela, koje je vlasnik buregdžinice donio u policiju. Upoređujući serijske brojeve na mobilnim telefonima i serijske brojeve na servisnim listovima „General servisa“, gdje je izvršena teška krađa, utvrdili

su da su na tim mobilnim telefonima upravo oni serijski brojevi, marke i tipovi kakve su imali telefoni koji su otuđeni iz „General servisa“.

Svjedok, Fadil Aliju je bez svake sumnje, sa sigurnošću potvrdio da je upravo od Leonarda Dushi dobio te telefone kao zalog za posuđeni novac.

Imajući u vidu navedene iskaze, kao i iskaz svjedoka Semira Letića, potvrde o privremenom oduzimanju i vraćanju privremeno oduzetih predmeta, te zapisnike o uviđaju od 13.08.2005 godine i 29.08.2005 godine, ali i snimak na CD-u koji predstavlja dijelove snimka sa kontrolne kamere u firmi „General servis“, koji prikazuju osobu koja svojom konstitucijom i fizičkim izgledom podsjeća na Leonarda Dushi, a očito je da se na oba snimka radi o istoj osobi, bez obzira što na glavi ima kačket, bez sumnje se potvrđuje da je optuženi Leonard Dushi počinio produženo krivično djelo teška krađa iz člana 287. stav 1. tačka a) u vezi sa članom 55. KZ FBiH.

Optuženi je počinio dva ista krivična djela teške krađe, bez sumnje u jednom kratkom vremenskom periodu, s istim ciljem i namjerom, u istom prostoru, isti oštećeni. Uvažavajući ove objedinjavajuće elemente sa logičnog i pravnog aspekta, ove radnje optuženog predstavljaju jedinstvenu cjelinu krivičnog djela teške krađe, odnosno iste su kvalifikovane kao produženo krivično djelo teške krađe.

Sud je našao opravdanim prijedlog Tužilaštva da se na glavnom pretresu pročitaju iskazi svjedoka Alfonsa Rakaj, Ermala Ler i Rešata Šalja, obzirom da ovi svjedoci nisu bili dostupni Tužilaštvu i Sudu kako bi se neposredno saslušali, a činjenice o kojima su svjedočili su realno od izuzetne važnosti za krivični postupak. Naime, Rakaj i Ler su, nakon što su pronađeni u stanu, vraćeni u Albaniju i sud je putem međunarodne pravne pomoći pozivao ove svjedoke, ali oba lica su se izjasnila da im je od strane naših nadležnih organa zabranjen ulazak u BiH na vremenski period od 10 godina, tako da nisu u mogućnosti doći u BiH. Očigledno je stoga da bi njihov dolazak pred sud bio znatno otežan, a u krajnjem i nemoguć. Što se tiče svjedoka Rešata Šalja, prema dopisu Ministarstva pravde BiH, obavješteni su od strane Interpola Skoplje da je poziv za ovog svjedoka uručen navedenom licu u selu Lipkovo, Kumanovo, ali se svjedok nije odazvao pozivu, niti je na bilo koji način obavjestio sud da neće pristupiti na glavni pretres. Obzirom da ovaj svjedok živi u Makedoniji, njegovo privođenje bilo bi znatno otežano, zbog čega je sud i u odnosu na ovog svjedoka donio odluku da se njegovi iskazi pročitaju.

Istovremeno, Sud nije prihvatio prigovor branioca prvooptuženog, da iskazi svjedoka nisu valjani, a iz razloga jer isti nisu položili zakletvu. Po ocjeni ovoga Suda iskazi su apsolutno valjani jer sadrže sva upozorenja predviđena zakonom i to kako članom 100. ZKP FBiH, tako i članom 86. ZKP BiH.

Kada se uzmu u obzir sve utvrđene činjenice, realne okolnosti i radnje koje je preduzeo optuženi Leonard Dushi, sve ukazuje na svijest, volju i namjeru optuženog, što čini osnovu za zaključak Suda da je optuženi sve krivično pravne radnje koje mu se stavljaju na teret počinio sa umišljajem, kao oblikom vinsti u izvršenju istih.

Optuženi Eljmi Iseni je bio svjestan da se u konkretnom slučaju radi krijumčarenju osoba i njihovom ilegalnom prebacivanju preko državne granice, pa kada je i pored svijesti o tome otišao po te osobe i dovezao ih u stan, te im rekao da nigdje ne izlaze i da nikome ne otvaraju vrata, a sve to po nalogu optuženog Dushija, znači da je Dushiju htio da pomogne u izvršenju krivičnog djela, na koji način je i on postupao sa umišljajem.

Za počinjena krivična djela Sud je optuženog Leonarda Dushija oglasio krivim, pa mu je za krivično djelo iz člana 250. stav 1. u vezi sa članom 189. stav 1. KZ BiH utvrdio kaznu zatvora u trajanju od 3 godine, za krivično djelo iz člana 373. stav 2. KZ FBiH utvrdio kaznu zatvora u trajanju od 6 mjeseci, a za krivično djelo iz člana 287. stav 1. tačka a) u vezi sa članom 55. KZ FBiH utvrdio kaznu zatvora u trajanju od 1 godine i 10 mjeseci, te uz primjenu člana 53. KZ BiH osudio ga na jedinstvenu kaznu zatvora u trajanju od 5 (pet) godina.


Kod utvrđivanja pojedinačnih kazni zatvora i osude na jedinstvenu kaznu zatvora, na strani optuženog, od olakšavajućih okolnosti Sud je cijenio da je relativno mlad čovjek, porodičan, bez zaposlenja, a od otežavajućih okolnosti sud je cjenio iskazanu upornost u izvršenju krivičnih djela, te da se protiv njega vodi drugi krivični postupak. Ocjenom svih okolnosti, posebno težine krivičnih djela i optuženog kao izvršioca, Sud nalazi da je u konkretnom slučaju, kazna zatvora na koju je osuđen optuženi, adekvatna krivično-pravna sankcija, srazmjerna težini djela i optuženog kao izvršioca, te da će se istom postići svrha kažnjavanja predviđena zakonom, kojom će se vaspitno uticati na optuženog da ubuduće ne čini krivična djela, odnosno da će imati preventivan uticaj i na druge da ne čine ista ili slična krivična djela.

Optuženom Eljmiju Iseni sud je izrekao uvjetnu osudu kojom mu je utvrdio kaznu zatvora u trajanju od 10 mjeseci, a koja se neće izvršiti ukoliko optuženi u roku od 2 godine od dana pravosnažnosti presude ne počini novo krivično djelo, nalazeći da je ista adekvatna okolnostima slučaja i stepenu krivične odgovornosti optuženog. Uvažavajući činjenicu da je optuženi porodičan čovjek, do sada neosuđivan, Sud nalazi da izricanje bezuslovne kazne zatvora, u konkretnom slučaju, nije nužno radi krivično pravne zaštite, te će se i sa uvjetnom osudom postići kako posebna, tako i opšta svrha kažnjavanja predviđena zakonom i vaspitno uticati na optuženog da ubuduće ne čini ista ili sličnokrivična djela.

Na osnovu primjene zakonskog propisa člana 74. stav 1. Krivičnog zakona BiH odlučeno je, da se od optuženog Leonarda Dushi oduzmu dokumenti pronađeni u iznajmljenom stanu i navedeni u izreci presude, kao predmeti koji su upotrijebljeni za izvršenje krivičnog djela i za koje postoji opasnost da će biti ponovo upotrijebljeni za izvršenje krivičnog djela.

Na osnovu primjene zakonskog propisa člana 198. stav 2. Zakona o krivičnom postupku Sud je oštećenu sa eventualnim imovinsko pravnim zahtjevom za naknadu štete uputio u parnicu, a osnovom člana 188. stav 4. Zakona o krivičnom postupku optužene oslobodio od dužnosti da naknade troškove krivičnog postupka, a iz razloga jer su isti bez zaposlenja, stalnih primanja, te bi dosuđenjem plaćanja troškova krivičnog postupka se znatno otežao materijalni položaj optuženih.

Zapisničar
Željka Marenić



POUKA O PRAVNOM LIJEKU: Protiv ove presude dozvoljena je žalba Apelacionom vijeću ovog Suda u roku od 15 dana od dana prijema presude.